


Katinngat • Normu siulleq - Marsi 2019

KATINNGA



**Katinngat
nutaamik
aallarteqqippoq**



Katinngat nutaamik aallarteqqippoq

PANEERAQ SIEGSTAD MUNK, PROVST

Ilagiit kalaallit lutherikkuusut qangaanerusoq 1900-kkoqarallarmat aviiseerannguat ingerlallu-arnikuulluni sivisuumik uninngasimasoq aallarteqqippoq. Tassunga ilanngunneqarsinnaapput ilagiit ingerlaatsitsinni pisartut, sulinermut tunngasunik paasisutissat, ilagiinniluunniit arlaanik oqallisissiatut saqqummiukkusutat.

Suliap ingerlateqqinniarnera sivisuumik uninngasimammata, taamalu suliaqartartut utoqqalinertik pillugu suliunnaangikkunik toqukkut qimagutereersimammata naqqaniik aallarteqqinniarsimavara. Taamaattumik pingaartumik palasit suliamut tunngasunik, teologimulluunniit tunngasunik eqqarsaatersuutinik allaaserisanilluunniit ilanngussisarnissaat kissaatiginaqaaq.



Narsarmijit oqaluffia

Takorloorpara ukiumut pingasoriarluni saqqummer-tassasoq, ilanngutassiat apeqquataallutik imaassinnaavoq ilaanni annikinnerusumik ilaannilu annertunerusumik imaqartarumaartoq. Marts aallarniutitut, Juni apersortittunut tunngasunik itisiliiviusoq aamma september ukialernerani pilersaarutinik diakonilu pillugit ilaatigut imaqartussatut saqqummerfiussasut takorloorpara.



Igalikup oqaluffia

Atuagassiannguaq upperisarsiornerup iluani eqqarsaatersuutinik paasisutissanilluunniit immersortagassaq illit immersueqataaffigisinnaavat. E-mailikkut nassius-sinnaangikkuit Provsteqarfik Kujataanut allakkatigut nassiusisinnaavutit, sammisassaqqissunilluunniit itisilersikkusutarnik piukkusaqaruit qulequttamik sammi-sinnaasannik aamma kissaateqarsinnaavusi.

Sapaatit tamaasa oqaluffinni sineriak tamaat, Guutip oqaasia biibilimik aallaavilimmik oqaluussissutigisarparput. Unali atuagassiannguaq ilagiittut ataqatigiiffiusunik ataatsimoorussatsinnillu immersorneqarsinnaammat atorluaqunaqaaq.

Aviiseeqqap aallartilernerani qujaffigerusuppakka Aasianni palasiunerma nalaani aviiseeqqamik ingerlatit-sinissamik noqqaasarsimasut. Puilasooq Aasianni nalliut-torsuit nallilerneranni saqqummersarnikup suliarinerani ilinniutigisimaqigakku.

Qanortoq sinerissami suleqaterpassuagut ilagiit sinniisaat, ajoqit, pattattut, palasillu Naalakkatta Jiisusip Kristusip nukissamik tunilisi. Suliassinnilu pilluaquneqaritsi.

Aaqqissuisoq: Paneeraq Siegstad Munk
Ilusilersornera, aaqqissorneralu: Info Design aps
Naqiterivik: Nuuk Offset aps





Palasit konventeqartut Nuuk september 2018

Ukioq 2018 Kalaallit Nunaata biskopeqarfiani

BISKOP SOFIE PETERSEN

Ukiut siuliinisut biskopeqarfimmi pisartut pisarsimapput, sulisut ilagiit sinniisaallu suliatik assigiinngitsut ingerlassimavaat; palaseqarfiit ilaani naalagiarfitsinerit avataatigut ilagiinnik sammisaqartitsisoqartarsimavoq oqaluffiillu assigiinngitsunut atorneqarlutik. Tamatumunngalu sumiiffinni sullissiumaneq apequtaasupilussuuvoq. Kajumissaariumavungalu ilagiit sinniisaanngikkaluaraanniluunniit aamma ilagiit sinniisaannut ilagiinnilu sulisuusunut saaffiginnittarnisamut arlaannik aqqissuussiniaraanni isumassamiluunniit pigisaqaraanni.

Ukioq 2018-imi palasit akornanni nutsertoqanngaatsiarsimavoq, tamannalu kinguneqarpoq aamma palaseqarfiit arlallit palaseqannginnerannik. Palaseqarfiit uku: Qaanaaq, Upernavik, Uummanaq Ittoqqortoormiit-llu palaseqanngillat. Narsami palasiusimasoq soraarpoq, Paamiuni palasi soraarluni Nuuk-mut nuuppoq, Uummannami palasi Ilulissanut nuuppoq, Nanortalimmi palasi Paamiunut nuulluni, Maniitsumi palasi Narsamut, 1. februar 2019 Qaanaami palasi Maniitsumut nuussaaq. Palasinngorlaarluni Nanortalimmi 15. januar 2019 atorfinippoq.

Palasit marluk soraarninngorsimapput, aappaalu Isak Davidsen dom-provstitut suliunnaarmat domprovstiaaq John Johansen 1. september 2018 sulilerpoq. Ilulissani palasi, siornatigut Provsteqarfik Avannaani provstiusimasoq Hans Johan Lennert soraarninngorportaqaq.

Palasit ataatsimiittarnerat ukioq allorlugu pisartoq 2018 Nuummi pivoq, tassani assigiinngitsut sammineqar-

put soorlu apersortittussanik atuartitsineq nutaanerusoq atuakkamik nutaamik tunngaveqartumik, biibili tunngavigalugu tarnikkut isumaginnineq, inatsisit allallu sulinit-sinnut attuumasuteqartut.

Ajoqinik pattattunillu ilinniartitsinerit ingerlajuarsinnarput: 2017-mi ajoqissat 13-nik aallartippat massakkullu 8 ilinniartuupput.

Pattattut (kirkemusiker) 7-it 2018 naammassippat, nutaamillu ilinniartitsinerit ukioq manna aallartissappat.

Provsteqarfikkuutaartumillu pattannermik ilinniartitsinerit sumiiffinni ataasiakkaani ingerlanneqartuupput.

Pattattunik, ajoqinik palasinillu pikkorissartitsinerit ingerlajuupput, ilai pinngitsooratik peqataaffigineqartussat allalli nammineq soqutiginnineq aallaavigalugu qinnuteqarfigineqarsinnaasut.

Pastoralseminaria, tassa palasinngornissamik eqqarsateqartut Ilimasimatusarfimmi ilinniareersimasut suliamut attuumasuteqarluinnartumik ilinniartinneqarfiaq, septemberimiit novemberip naaneranut ingerlanneqarsimavoq. Ilinniartut sisamat allagartartaarput, taakkunannigalu ataaseq palasit atorfingilluni sulilereerpoq.

Ilageeqarnermi oqariartuut – asanninnikkut nallerneqarsinnaanngitsukkut Kristusikkut imaannaanngitsumik tunineqarsimanerput – nalissaqanngilaq, tamanullu tunnius-saasaarluni, taamaattumik matumuuna kajumissaassavakka pattattut, ajoqit palasitulluunniit ilagiinnik kiffartuussiumasut palaseqarfinnut ataasiakkaanut aamma paasi-niaallutik saaffiginnittaqqullugit.



Paamiuni palasip illua allaffiutigisog

Avannaata provstianit

ALLATTOQ: PROVST MARIANNE PLATOU OLSEN

Ukioq 2018

Avannaata Provsteqarfia ilaatigut unammillernarsinnaagaluarluni suliffiuvoq pissanganartoq nuannersorlu.

Avannaata Provsteqarfia 8-nik Palaseqarfeqarpoq, 29-nilu nunaqarfittaqlarluni. Qaanaamiit Kangaatsiamut palaseqarfiit Avannaata Provsteqarfianut atapput.

Provsteqarfipput palasinik amigaateqarpoq ukunani palaseqarfinni: Upernavik sivitsortumik palaseqanngilaq. Uummannaq 1. Oktober 2018 palaseeruppoq. Palasiat Ilulissat Palaseqarfianut nuunna pissutigalugu.

Avannaata Provsteqarfiani ilagiit sinniisaat amerlanerit ilaasortaqrput, qinersinerulli kingulliup 2017-imi pisup kingorna nunaqarfiit uku ilagiit sinniisaannik qinersiviunngitsoorput, taamaattumillu ilagiit sinniiseqaratic: Siorapaluk, Kangersuatsiaq, Nuussuaq, Saattut, Kangerluk; Akunnaaq kiisalu Qeqertaq.

Avannaata Provsteqarfiani ajoqit amigaataasut ukunaniipput: Savissivik (atuaasoqarpoq), Kangersuatsiaq (atuaasoqarpoq), Kullorsuaq (soqanngilaq), Naajaat (soqanngilaq), Attu (atuaasoqarpoq), Akunnaaq (atuaasoqarpoq), Ilimanaq (soqanngilaq).

2018 aasakkut palasi Hans Johan Lennert soraarninngorluni Danmarkimut nuuppoq. Provsteqarfiup allaffimmia november 2018 soraarpoq, malitsigalugulu allaffimmiumik nutaamik allaffimmiortaarpugut november naalersoq.

Ukioq 2019

2019-imi pilersaarutit pisussallu:

Provsteqarfik Avannaanut Palaseqarfik Qaanaaq ataqqilerpoq 1.februar 2019 aallarnerfigalugu, Qaanaami palasi Maniitsumut palasinngortussaammat.

Qasigianniguit palasiat qaammat marts 2019 erninerminut atatillugu sulinngiffeqalertussaavoq, taamaasilluni Qasigianniguit palaseerukkallassapput.

2019-imi angorusuagut angorusunnaqaat makkuusut: Avannaani palaseqanngitsut palasitaarnissaat, kiisalu palasit illuisa iluarsartariallit iluarsarneqarnissaat, palasinngorumaartussanut kajuminnarnerusunngorlugit.

Kissaatitta anginerit ilagaat Oqaluffiup Zionip iluarsarneqarnissaa. Oqaluffik ukiukkut issitsillugu naalagiarfigineqarsinnaajunnaartarmat taamaattumillu qaammatit 3-t missaani matoqqasariaqartarluni, Naalakkatta Illua kisimi naalagiarfulertarluni.

Ukioq 2018 provsteqarfitsinni palaseqarfiini nunaqarfinilu ingerlaneq aningaasaqarniarnikkut suleqatigiinnikkullu ajunngitsumik ingerlasutut nalilerusuppara, taassumunngalu pissutaavoq suleqatigiinneq ajunngitsoq paaseqatigiilluarlunilu ingerlaneq biskoppeqarfiup, provsteqarfiup palaseqarfiillu akornanni ajunngitsumik ingerlasimasoq.

2019 neriulluarfigaarput suli suleqatigiinneq ajunngitsumik ingerlassasoq, ikioqatigiinnikkut ingerlaqatigiinnermi. Neriutillu angisuut piviusunngortinneqarumaarneri neriutigaagut. Palaseqanngitsut palasitaarnissaat, oqaluffiit aammalu palasit illuisa aserfallannikut suliarineqarnissaat.

Aasiaat oqaluffiat

SULIARINNITTOQ: QUJANA FLEISCHER

Aasianni Ilagiit sinniisaat:
Siulittaasoq: Qujana Fleischer
Tullia: Johanne Schultz
Allatsi: Wilhelm Søholm
Ilaasortat: Tobias Rasmussen,
Amalie Kùitse.



Aasianni Ilagiit sinniisaasa suliaqartarnerannut tunngasut:

Ilagiit sinniisaat qaammatit tamaasa ataatsimiittarput, naak ukiumut sisamariarluta ataatsimiittarnissaannut oqariartuuteqartoqaraluartoq ataatsimiinnersiuteersuagut neqitsiullugit, kisiannili taakkua annerutinagit ilagiinnut sullissiniarnerput annerutittuarparput, tamannalumi nunaqarfittatsinnut Kitsissuarsuit, Akunnaarlu suleqatigiilluarnitsinnut tunuliaqutit ilagilluinnarpaat, aallaallumi illoqarfiit arlaanniit saaffigineqartuurtarpugut suliaqat pillugit.

Aviisinnuaq Puilasooq sapaatini annerni ilagiinnut saqqumersittarparput, nammineerluta suliaralutigu, assigiinngittunik sapaatini nalliuttuni tulluurtunik, ilagiillu oqariartutaannik imaqartittarparput.

ukiup aallartinnerani qaammatini tulluuttut ingerlanissaanni ilagiit sinniisaanniit palaseqarfik suleqatigalugu pilersaarusiortarpugut pisussanik ataatsimiinnsinni eqqartueqatigiittarpugut, pilersaarutit ilagiinnut tusarliunniartarpagut, aammalu ilagiit oqariartuutaat tusarusuttarlutigit sapaatini arlaanni naalagiereernerup kingorna.

Juullilernerani pisartut ilagaat meeqqerivimmiut, atuarullu minnerit naalagiernerisa nalaani ilagiit sinniisaasa suliaannik isiginnaangassiannuamik takutitsilaartarneq, tassalu Jiisusinnuup inunngornerani pisimasooq, taannalu meeqqanik nuannarineqarluartarpoq.

Ammattaarlu juullilernerani utoqqaat pisinnaajunnarsimasut kaageaqqanik pajugutissanik suliaqartitsisoqartarpoq, tamakkulu aamma ilagiit sinniisaanniik palaseqarfimmiillu aningaasanik Diakonimut qinnuteqaassussinikkut pisarlutik.

Oqaluffipput ullumikkut nutartertuarpoq, suleqatigiin-nitsigut aqqitassat pisariaqartut ingerlanneqartuarput, sulilu ingerlallutit, soorunalumi pinngittoorusunngilagut peqatigiiffiit, suliffeqarfiit, inuinnaallumi tunissuteqartarneri qujassuteqassalluta, tamakkulu ilagiit sinniisaannut palaseqarfimmullu suliniarnitsinnut nukittorsataasarpud.

Ukiup ingerlanerani pisartut:

Qeqertarsuup tunuani Ilagiit Sinniisaat nunaqarfinniit, illoqarfinniillu ukiut tamaasa isumasioqatigiittarpugut, soorunami isumasioqatigiittarnerup aallarteqqaarnerani avannaani Upernavik tikillugu peqataasoqartarpoq, kisiannili aqutit pequtaallutik akuttunerulersimapput, 2018-mi Akunnaami 25 - 26 sept. isumasioqatigiisimapput peqataasimallutik Qeqertarsuaq, Kitsissuarsuit, Aasiaat, Akunnaaq, Ikamiut, ulloq taanna sila anorlernerani, aammalu angallassisusaqannginneq pequtaalluni Saqqaq Ilulissat, Oqaatsut peqataatitaqanngitsoorput, aappatigut uggornalaarpoq illoqarfiit, nunaqarfimmi allat peqataatitaqannginnerat pingaaruteqarluinnartarmat ilagiinnut sullissiniarnermit immitsinnut immersueqatigiittarnissaq,

Isumasioqatigiinnermi amerlanngikkaluarluta oqalliseqatigiinnerput immersoqatigiinnitsigullu pissarsiaqarfigeqarput, soorunami nunaqarfimmi innuttaasut mininneqanngillat isumasioqatigiinneq naammassimmat unukkut aggersaasimavugut Ilagiit sinniisaasa suliarisartaagaat nassuiaassutigineqarput, apeqquteqartitsisarsimallutalu, tullissaanimut Ilagiit sinniisaannut qinersisoqalerpat qinigassanngortittoqarsinnaanissaanut kajumissarutitit piareersaataasumik, aappaagumullu Qeqertarsuarmi pissatut aliagiiffigineqarsimavoq.



Egedep Oqaluffia

Kitsissuarsuit Oqaluffiat 90-liisoq:

Kitsissuarsuit oqaluffittaarnera oktoberip qulaaluaani 1928 pisimavoq, tamannalu nalliuttorsitigineqarsimavoq sapaammi 28 okt. nal. quliniit naalagiaqatigiinnermi, Aasianniillu palasi, palasinngorniarlu, ilagiit sinniisaan-nilu ilaasortat ilaat peqataasimavugut naalagiereernerup kingorna atuarfimmi najoqqaasitsisoqarpoq, taassumallu saniatigut ajoqi Thele ukiuni 19-ni alajaalluni ilagiinnut sullissilluartoq ilagiit sinniisaanniit palaseqarfimmiillu tunissuteqarfineqarpoq, aammalumi oqaluffiat nalliuttorsortoq mininneqanngilaq.


Angeruseq

MINNA WINSLØW, BISKOPPEQARFIK

Ilagiit kalaallit lutherikkuusut nutaamik apersortit-tussanut atuakkamik saqqummersitsippot taallugu "Angeruseq". Atuagaq illoqarfinnut tamanut nassius-suunneqareerpoq Palaseqarfiiit nunaqarfittaminnut ingerlatitseqqissapput.

Atuartitsissutissatut atuagaq Danmarkimi sanaajunngi-laq, kisiannili nunatsinni pissutsit aallaavigalugit uagut ilagiit kalaallit lutherikkuusut atuagassatsitut sanaajulluni. Perorsaanermi suleriutsit assigiinngitsut atorlugit aqqis-suussaavoq, sammisassat assigiinngitsut periarfissaallutik. Taamaalliluni nukappiaqqat uummaarissut niviarsiaqqallu tunuarsimaartortaqarpata tamarmik peqataatinniarneqar-nissaanut sakkussaasinnaallutik. Atuakkami ajoqersuussi-niarnertut eqqarsaateqarnani kisiannili uppernerup qanoq atorneqarsinnaanera salliutinneqarpoq. Taamaattumik sammisassani issiaannarnani atuartitsinissaq Angerutsimi maluginiagassaavoq.

Palasip atuagaata imarai atuartitsineri qanoq iliornis-samut ilitsersuutit aamma quppernerit kopeerneqarsin-naasut, taakku suliasartaqartarput. Taamaalliluni ajoqi



atuaasorluunniit apersugassanik atuartitsippat iliuusissat tassani takuneqarsinnaapput.

Atuagaannaanngitsunik nassiusuivugut, suliaqarnermi atortuusinnaasut qalipaait assigisaallu ilanngullugit nas-siussuunneqareerput.

Angeruseq atuagaq pillugu apeqqutissaqartoqaruni ima-luunniit uparuaatissaqaraanni Minna Winsløw biskoppe-qarfimmiittoq attavigineqarsinnaavoq uunga:

minw@ilagiiit.gl

Uppernarsaatnik nutaanik peqqinniarneq

STIFTSKONTORCHEF MORTEN NORNILD-IMIT

Uppernarsaatnik nutaanik peqqinniaaraanni, up-pernarsaatnik tuluttuunik piniaraanni atermillu allannguiniaraanni akiliisalernissaq pillugu 2019-imi upernaami malittarisassat nutaat takkutiler-sut.

Akiliisalernissaq pillugu malittarisassat nutaat ukiuni ar-laqartuni piareersarneqareersimalerlutik maanna kiisa-mi atuutinneqalissapput. Tamanna isumaqarpoq upper-narsaatit aalajangersimasut nutaamillu aternaarniarnerit amerlanerit piniarniaaraanni akiliisoqaqqaartalissasoq. Uppernarsaatit kalaallisut allassimasut kisimik nutaa-mik piniaqqinneqartarneri akeqalissapput. Imaappoq, su-li inunngornermut kuisinnermullu allagartaq, katissima-nermut uppernarsaat naalagiarnertalimmilluunniit tun-ngasuni allani uppernarsaasioq sulis "akeqassanngillat". Kisianni uppernarsaat tammarsimagaanni nutaamillu pi-niaqqinniaaraanni, taava nutaassaq akeqalissaaq.

2014-imili uppernarsaammik nalinginnarmik ilagiinnit kalaallineersumik tuluttut/kalaallisut allassimasumik pis-sarsinissaq ajornarunnaarnikuvoq. Tuluttut allassimasut immikkut kiffartuussinertut isigineqartarput siunissamilu taakku tamatigut akeqartalissapput.


Atermik allanngortitsiniarnerit amerlanerit tamarmik aamma siunissami akeqalertussaapput. Tassunga ilaan-ngillat angajoqqaat katinneq aqqutigalugu aternaartar-nerat, nammineq kinguliarisimasap kinguliareqqilernerana (katittoqartillugu/avittoqartilluguluunniit), angajoqqaar-siat kinguliaat kinguliarilertarneri, kinguliarisimasalluun-niit siuliup kinguliareqqilerneranut uppernarsaatit.

Siunissami inniminniilluni immersugassatut ittumik im-mersuisoqartalissaaq (uppernarsaammik nutaamik aala-jangersimasumik piniarluni, atermilluunniit allanngortit-siniarnermi), taanna palaseqarfimmut inunngorfigisima-samut kuisiffigisimasamulluunniit nassiuunneqassaaq tun-niunneqassalluniluunniit. Najugarisami palaseqarfimmut

aamma tunniunneqarsinnaavoq, taakkulu nassiuteqqinnissaa isumagissavaat. Tamatuma kingorna 150 kr.-mik (uppernarsaammut) imalt. 300 kr.-mik (atermik allannguinnermut) atatillugu akiliisoqartalissaaq. Uppernarsaat piareerpat, oqarasuaatikkut nalunaarutigineqarsinnaavoq aasariaannangortoq.

Ilitsersuut kalaallisut qallunaatullu allasimasooq saqqummersinneqarsimavoq, taannalu ilagiit.gl-imi imalt. sullissivik.gl-imi alakkarterneqarsinnaavoq, tassani ilitsersuutitaqarpoq uppersarsaatit nutaamik aterluunniit allanngortinniaraanni qanoq iliortoqarsinnaaneranut. Tamatuma saniatigut soorunami aamma palasi attavigineqarsinnaavoq.

Akiliisarnissamut malittarisassat nutaat atuutilissapput 2019-imi marsip aallaqqaataani imalt. apriliip aallaqqaataani.



attestit assigiinnigitsut

Palasit erinnersaartarnerat pillugu

PANEERAQ SIEGSTAD MUNK

Aperineqarpunga sooq palasit ilai erinnersaarneq ajornersut. Apeqqut soqutiginarimat erinnersaartarnermut tunngasumik naatsunnguamik allaaserisaqalaalerpunga. Sooq palasit ilai erinnersaaratik naalagiaritsillutik erinnersaartakkat atuaannartarpaat?

Nunatsinni isumaqarpunga ukioq 2005 missaani pisoqartoq. Ukiormi taanna Rituali maannakkut atuuttoq naqiterneqarluni atortussanngortinneqarpoq.

2004-mi palasinngorpunga angumeraaralu erinnersaartarnermut pikkorissarneq. Tassa palasit sulisut akornanni taamaattussaannartut sulii ingerlasimassaaq uanga palasinnagornerma nalaani.

Allakkalli ritualillu kalaallisut saqqummersartut mipsisoraanni nassaassaavoq 1887-imi saqqummersooq; maligtarissagssat palasit suliokataisalo nālagiaritsissarneráne, Ritual for den grønlandske Kirke, Kjbh.: A. Rosenbergs Bogtrykkeri taanna naqinneqaqqittarsimavoq ukiumi 1888; 1918; 1919; Naqitikkat nutaat 1935; 1959 allaassutigiinnarpaat naqiterivik allanngortoq tassaalerluni J. H. Schultz bogtrykkeri. Ukioq 1887-imi saqqummersumi qupperneq 6-imi “sapingikune erinersårdlune” atuakkalli sinnerani allaqqavoq: “erinersårdlune”. Tassa erinnersaarneq taamaattussaannartut isigineqarpoq.

1988 Ritualissamut siunnersuut, Ilagiit Kalaallit Siulersuisui naqitami erinnersaarneq oqaatsimik ataatsimilluunniit taaneqanngilaq. Kisianni soorlu eqqaareerenga 2003 palasinngorniarama erinnersaarnissamut allaat praktikkerfinni sungiusarneqarpunga.

2005 Rituali, Ilagiit kalaallit lutherikkuusut naalagiarnerni oqaluffinnilu suliaasuni atugassat. Ataqqinartorsuarmit Dronning Margrethe II-mit atortussanngortitaq. Biskoppeqarfik Kalaallit Nunaat. Danmarkimi Biibilissiinaqatigiit. Tassani allasimalerpoq ungaluuserlugu: (Erinnersaarneqarsinnaavoq). Tassalu tamatuma kingorna Ilageeqarnermut inatsiseqalerpugut 2010. Ilinniartitaaneq biskoppeqarfimmit tigummineqalerpoq. Tassani aatsaat erseqqissumik oqaatigineqartalerpoq palasi kiffaanngissuseqartoq erinnersaarusunnerluni erinnersaarusunnginnerluniluunniit.

Nunatsinni pisut Danmarkimi folkekirkemut atagatta tassani pissutsit amerlasuut nunatsinnut apuuttarput. Taamaakkami oqaluttuarisaanikkut atanerput ilageeqarnermut aamma attuumassuteqartarmat Teolog Holger Villadsenip Bibelselskabip hjemmesideani allaaserisimaanik tigulaarinnillunga tunulequtaa itisileriffigilaassavara.

Danmarkimi ukioq 1949-mi palasit nammineq aalajangersinnaalerpaat erinnersaassanerlutik atuaaginnas-sanerlutilluunniit. Oqaluttuarisaanermili ilageeqarnerup iluani erinnersaarneq ileqquuvoq qangarsuaaniilli ingerlaavarsimasoq, naalagiarartoqarneranullu atalluinnartutut inissisimasoq.

Ukiuni akullerni naliginnaasuvoq palasi erinnersaartarluni. Tamannami ilageeqaleqqaarneraniilli ingerlasimavoq. Isumaqartoqarsinnaagaluarpoq Lutherikkut nutarsaaqqinneranni tamanna ilanngullugu allanngortinneqarsimasinnaasoq – taamaannagarli. Tassami Lutherip

nammineq erinneraarnermut nipit nuutiliorlugit siunnersuuteqarsimavoq ukioq 1526-mi. Siunnersuutaali taakkua atulinngisaannarsimapput Tysklandimi Danmarkimiluunniit. Imaappoq Lutherip aamma ileqqoq taanna taamaattussaannartut isigisimagaa.

Ukiuni akullerni Danmarkimi ileqqoq tamanna ingerlasimaneranut takussutissaavoq Thomissønip tussiutit naqitertitaani 1569-meersuni. Tussiutimmi tunuanni ilagiit lutherikkuusut evangeliulersaartut palasiisa erinneraarnerannut ilagiillu akissutaannut nuutil ilanngunneqarsimammata. Nuutil taakkua nutarsaasoqanngikkallarmalli ingerlasuusimapput, nutarsaasoqaraluarimat ataannarsimasutut taasariallit.

Piffissami 1685imiik 1992 tungaanut tunngaviusumik ritualit malillugit ilagiit lutherikkuusut taama ingerlaaseqarsimapput. Tassami Rituali 1685-imi saqqummer-soq malinneqartarsimammatt. Allassimavoq palasi alterimiikkaangami suut tamarluinnangajaasa erinneraassagai. Naalakkap najorlisi. Qinuniarta tamatta. Biibilimik atuaalernermi. Ataatarpoq aamma Nerliiviliarnerup atoaartinneqarnerani. Naalakkap pilluaqussutaa.

Ritualimi nassuitsumik allanneqarsimannilaq nuutilersorlugu qanoq palasi erinneraartassanersoq, “ileqqorli malillugu erinneraartoqassasoq”. Tassa palasit ataasiakkaarlutik erinneraarnermi pissusilersuutit ingerlattarsimavaat.

Danmarkimi 1700-kkut naalerneranniit palasit ilai erinneraartarunnaarsimapput, ileqqoq sungiusimanagu misigisalersimagamik. Ajoraluartumik tamatuma kingorna pattagissamik ingiorteqarluni tussiartarneq annertuumik atungaanerulerpoq, taamaalilluni palasip erinneraarneranit ilagiit akissutaat pattagissamik ingiorneqartut palasip ilagiillu akornanni “naligiinngitsumik” pissuseqartarneq ingerlalersimalluni. Imannak paasillugu ilagiit nipaannarmik tussiarangamik palasilu erinneraaraangat naa-

lagiarneq naligiilluni ingerlanertut isigineqarsinnaasoq. Taamaalilluni pattangiamik ingiorteqarani palasi erinneraaraangami sungiusimanninngitsunut eqqumiiginarsisimasinnaalluni.

Palasilli amerlasuut erinneraartarneq ingerlatiinnarsimavaat 1832-mi saqqummerput Kantor Johannes Wibergip “Erinneraarnermi nuutil”. Tamatuma kingorna pastoralseminariani atorfinitsitsisoqarpoq erinneraarnermut atuartsisussanik.

Ukioq 1935 Jens Peter Larsen atuakkamik naqiterisitsivoq erinneraartarneq nutarteriffiginarlugu, imaluunniit Wiberg sioqqullugu ileqqunut uterteqqikkumallugu. Taanna arlaleriarluni saqqummersineqarpoq, kingullermik 1998-imi.

Ukioq 1949 danskit biskoppii Naalagiarnermi ritualit pillugit ilitersuummik nalunaaruteqarput. Tassani palasit erinneraartartut naatsersuutigineqarpoq. Maannali periarfissatut nutaatut taaneqarpoq palasip qinnutit atuagasallu erinneraarnermi pisinnaagai. Tassa taannaavoq siulterpaamik pisortatigoortumik takussutissalimmik erinneraarnermi pisoqarsinnaaneramik naqitaq.

Danmarkimi rituali kingulleq 1992-imi saqqummerpoq. Tassanilu erinneraarneq siullertut taaneqarunnaarluni atuaaneq siulliullugu allanneqarsimavoq. Tassani allasimallerpoq: “Palasip atuassavaa”, taamaalilluni ingerlaannaq erinneraassanerlugu taamaattussaannartut eqqarsartoqartarunnaarsimasoq takussutissaqalerpoq. Taamani iivangkiliu oqaluussissutissaq oqaluttarfimmiik atuarneqarpoq, oqaluttarfimmiillu erinneraarneq atorneqarpoq.

Ullutsinni Danmarkimi nunatsinnilu palasit amerlannigitsut kisimik erinneraartarput, imaluunniit erinneraaneqarsinnaasut ilaannai naalagiartitsinermi erinneraartarlugit.

Qujamasunneq pillugu biibilimit allassimaffiit tallimat

PANEERAQ SIEGSTAD MUNK

Qujamasunneq

Pilianik peqqumaateqalernerup qujamasunneq misigitittarpa. Qujamasunnerluuna ilaatigut biibilimi qanoq eqqartorneqartoq. Qulequtalerlugit ima saqqummiutsigit:

1. Qujamasunneq naatsersuutiginninnerlu

Tussiaatit 145 vers 10 + 14-16:

Pinngortitavit tamarmik qutsavigissavaatsit, Naalagaq, ilinnullu upperluartut unnersiutigissavaatsit. Naalakkap najummisarpai orlulersut tamaasa, massitsittarlugillu taaqqungasut tamaasa. Tamarmik isaat ilinnut sammipput, nerisassaannik tunisarpatit piffissaq eqqorlugu.

Assatit ammartarpatit pinngortitalu tamaasa kissaatigi-saannik qaarsillartittarlugit.

Oqaatsit “isaat ilinnut sammippit” takutitsippit isiginnittut inuit arlaanik naatsersuutigisaqartut. Tassalu nerisassanik tunineqarnissamik neriuttut. Guutimmi assani ammartarpai qaarsillaatissittarlutalu.

2. Qujamasunneq eqqasuuteqannginnerlu

Markusip evangeliuani kap.4, 26-32:

»Guutip naalagaaffia soorlu tassa inuk naatsiiassanik nunamut siaruarterisimasog. Sinittarpoq makittarlunilu, unnukkut ullukkullu, karrillu naajartorput alliar-torlutillu, naluaali qanoq pisut. Nuna imminek inerititaqarpoq – siullermik kanaartamik, taava karrertaqarfimmik taavalu karrertaqarfimmi karrertanik inerissimasunik. Karrilli inerikkaangata erninnaq killuilersarpoq katersuiffik nalliummat.«

Oqarporlu: »Guutip naalagaaffia sumik assissarsisinaavarput assersuulluunniit suna atorlugu oqaatigissavarput? Soorlu tassa siinuppip naatsiiassartaa: Nunamut ikkunneqarnermini nunarsuarmi naatsiiassanit tamanit minnerusarpoq; siaruarterneqareeraangamili allisarpoq naatitanit allanit tamanit annerulersarluni avalequteqalerluni angisuunik alannuani qilaap timmiai ullu-liorsinnaalersillugit.«

Namineerusuttangaaratta suna tamaat aqukkusutaraluaqaarput. Ilaanni angummassinnaanngitsutut allaat misigilersarluta. Allassimaffimmi atuarsinnaavarput inuunerup ingerlanerani suna tamaat aqussinnaasannikkippit. Soorlu narsaatini naajartortartut annerusumik uangut inuit sunniteqarfigisinnaasannikkigut. Inuunermili namineq qanoq iliuseqarfigisinnaasagut sapinngisamik ajunngitsumik iliorluta ingerlanniartigit. Inuunermi qujamasuutigissavarput Guutip qimanngisaannaraatit.

3. Qujamasunneq eqqarsaatillu nikinnerat

Paulusip Filippimiunut allagai kap.4,4-7:

Naalakkami tipaatsuttuinnaritsi! Oqaqippunga: Tipaatsugitsi! Qanilaarsusersi ilisimaneqalerli inunnit tamanit. Naalagaq qanippoq. Sumilluunniit isumaku-luuteqarnaveeritsi, kissaatigisasili qanoq ittukkulluunniit Guutimut saqqummiuttarsigit qinullusi torlulal-lusilu qujallusilu. Taava eqqissinerup Guutimit pisup siuneqassusernit tamanit annerungaartup uummatisi eqqarsaatissilu sernigissavai Kristusi-Jiisusimi.

Isumakuluuteqarneq qujamasunnerup akerleraa. Biibilimi allassimaffiup suut isumakuluutigut Guutimut tunnitequai, taamaalilluni qujamasunninngussamata. Allassimaffik upperigutsigu qamani qanilaarneq

pilissaaq. Uani pineqarunangilaq inuttut ajunngit-suaannartunngussasugut, kisiannili eqqarsaatit Guutip tungaanut saatsikkutsigit sunniteqarumaarneri pineqarpoq. Allamimmi pitsaaneqarunangilaq qujamasuleraangatta inoqatitsinnut qanilaarnerulertaratta. Isumatusaarsinnaalersarluta, tuniserusunnerlu aamma misigilersarlutigu.



Gertrud Raschip Oqaluffia, Qaqortoq

4. Qujamasunneq inuunerullu pingaassusaa

Paulusip Thessalonikamiunut allagai siulliit kap.5,16-18:

“Tipaatsuttuannaritsi, qinuttuinnaritsi, qanorluunniit atugaqaralarussi qujasaritsi, tassaammat Guutip illisi pillusi piumasaa Kristusi-Jiisusimi.”

Qujaneq eqqaamajuk! Imaanngitsoq qaffassimaartunngussasugut, kisiannili inuunerup pingaassusaanik uagullu imminut angisuutinngitsugut ersersinneqartar-mat. Qujasannikkuttami inuuneq taamaattussaannar-tut isigineqalissaaq, soqutaarpiarunnaarluni isumaarut-tarlunilu. Tunissutisiatit kisikkit: Timi, inuussutissat, ikinngutit, timmiaaqqat qarlorpaluat, nipilersuutit, asa-sat – anersaartorsinnaasutit. Taakku pillugit Guuti qut-savigisaruk.

5. Qujamasunneq aamma naassaanngitsoq

Petrusip allagai siulliit Kap.1,3:

Unnersiutigineqarli Guuti Naalakkatta Jiisusi-Kristusip Ataataa, naakkinninersuani naapertorlugu Jiisusi-Kristusip toqusunit makinneratigut ernioqqissikkamisi-gut neriugisamat uumasumut.

Neriugisag uumasog pillugu qujamasunnitta inuunerput ilusimavaalusooq. Oqaatsimmi taakkua kuisittoqarnerani aamma ilisinermi oqaatigisarpagut. Aallaqqaataallutillu naggataajupput kristumiusut inuunermi. Ilaatigummi neriugisap uumasup qanoriliorfeeruteqqasugut massitseqqittarpaatigut. Naak ilaanni nukissaqanngitsutut misigisimasugut ingerlateqqittarpaatigut. Ilaanni annaasaqarsimalluta aliasuuteqartugut oqaluffinnuaq ornittaraarput Guuti qutsavigalugu neriullutalu assamminit iperanngisaannassagaatigut.


Atuagaq "aliasunneq" – nuannaarnerup eqqaassutissartaa

Ukiaq 2018 nuannaarluta atuagaq nutsersimasara toqkukut annaasaqarnermut tunngassuteqartoq naqitertereerlugu tuniniarnera aallartilersorlu paasitineqarpunga qallunaatut atuakkiortuata kukkuneqar-mat siammartequnngikkaa. Suliaq naammassereermat Palaseqarfinnullu nassiussuunneqaleraluarmat ajual-laatigigaluarlugu aalajangiinnarnikuuvunga siam-marteqqinneqarani unitsiinnarneqassasoq.

Saqqummermat KNR radiokkut allaat eqqartorlugu saqqummereernikuugaluarama ilagiinnit paatsuugasoq-sammat una nassuiaatitut naatsumik ilannguppara.

Suliami nunami allamiut atuakkiaanik nutserinermi saqqummersitsinermilu mianernartoqarsinnaasoq paasi-vara. Taamaattumik maannakut piffissaqarfinni sam-misaq toqkukut qimagaanermi aqquusaakkanut tunnga-soq unitsiinnarusunnagu piareersarpara, nammineq ka-

laallit aallaavigaluta imaqartumik immersorniarlugu. Qaqugukkulluunniimmi toqorsuaq takkuttarpoq, ilagiin-nilu sulisuusugut allatut iloriaqqiffissaaruffimmi saaffigi-neqartuutaratta pisariaqarpoq itisiliisumik sammineqar-nissaa.



Atuakkap saqqaa

Palasinik ivertitsinerit

Provsteqarfik Kujataani palaseqarfii sisamaa-sut tamarmik palaseqarput, uangalu tallimaliullun-ga Palaseqarfii Paamiut, Narsaq, Qaqortoq aamma Nanortalik palasiuvugut. Ilagiinni sulisutut allatuul-li ingerlagaluarluta taasariaqarsoraara agguaqatigii-sillugit ukiugut alutorilaarakkit, ullumikkut 42-voq. Nukarliit marluk 35-nik ukioqartoq angajullersarput 62-nik ukioqarpoq.

Palaseqarfik Paamiut 14. oktober 2018 James Ignatiussen ivertinneqarpoq.

Palaseqarfik Narsaq 16. december 2018 Nukannguaq-Augustine Petrussen ivertinneqarpoq.

Palaseqarfik Nanortalik 13. februar 2019 Hans Frede-riksen ivertinneqarpoq.

Neriuppunga ilagiit palasitaatillu nuannersumik toqqis-sinartumik ineriartuutaasumillu suleqatigiilluarumaartut.



Paamiuni ilagiit simmiisaat



Narsami ilagiit simmiisaat

SMS 1771 aamma artorsarneq.gl

Internetikkut mobilikkullu palasimut attaveqarsinnaaneq ukioq 2018 periarfissaalerpoq. Ammasarpoq Ataasinngorneq, pingasunngorneq tallimannngornerlu nalunaaquttap akunneri 15 – 17 aamma 20 – 22.

kami inuttut killiffiani peqatiginissaa. Amerlasuutigullu tusarnaarneqarneq eqqarsaatinilluunniit avitseqateqarneq tuppallersaataasarpoq.

Kinaanerit taanngikkaluarlugu sunilluunniit palasimut oqaloqatigiissutigerusutaq pillugu saaffiginnissinnaavutit. Palasit arfinillit paarlakaalluta piareersimasuusarpugut. Ilaanni allaqateqaraangatta saaffiginnittullu allaqatigiinneq naammaginngippagu, palasi toqqarlugu ornillugulu oqaloqatigineranut innersuussisinnaasarpuq.

Palasi nipangersimasussaataalluinnarpoq, suulluunniit eqqartukkat palasilu kinaanersiluunniit paasinagu kisissi pigisarpasi, oqaloqatigiissutaasartut nalunaarsorneqarneq ajorput. Pingaarnerpaavoq pisariaqartitsisoq saaffiginnik-



Qaqortumi naneruutit apummi ikumasut



Palasit inissisimanagerat



	2017	2018
Nanortalik:	James Ignatiussen	James Ignatiussen
Qaqortoq:	Paneeraq S. Munk	Paneeraq S. Munk
	Minik Schmidt	Minik Schmidt
Narsaq:	Nukánguak Adolfsen	Nukánguak Adolfsen/ Nukannguaq A.Petrussen
Paamiut:	John Johansen	John Johansen/James Ignatiussen
Nuuk:	Isak Davidsen	Isak Davidsen/John Johansen
	Emilie Steenholdt	Emilie Steenholt
	Mānguak Dalager	Mānguak Dalager
	Aviaja R. Hansen	Aviaja R. Hansen
Maniitsoq:	Nukannguaq A. Petrussen	Nukannguaq A. Petrussen
Sisimiut:	Paulus Christensen	Paulus Christensen
Kangaatsiaq:	Parma Andersen	Parma Andersen
Aasiaat:	Paneeraq S. Munk/ Dorte T. Petersen	Dorte T. Petersen
Qasigiannuit:	Henriette Didriksen	Henriette Didriksen
Qeqertarsuaq:	Bendt Kristiansen	Bendt Kristiansen
Ilulissat:	Marianne P. Olsen	Marianne P. Olsen
	Hans Johan Lennert	Hans Johan Lennert/Ludvig Fleischer
Uummannaq:	Ludvig Fleischer	Ludvig Fleischer
Upernavik:	Eqilana Simigaq	*
Qaanaaq:	Juaanna Platou	Juaanna Platou
Ammassalik:	James Ignatiussen	James Ignatiussen/Thala Samuelsen
Ittoqqortoormiit:	*	*
Qallunaat Nunaat:	Jens-Kristian Kleist	Jens-Kristian Kleist

*: Palaseqanngilaq

Pikkorissarnissami pilersaarut 2019

BISKOPPEQARFIK



Saarluq Oqaluffia

Qeqqani organistitut atorfilinnut organistitut pikkorissartitsineq – Jens Gjærae-mit Marlunngorneq februarip 19-iat – sisamanngorneq februarip 21-at Hotel Hans Egede-mi

Qinnuteqarfissaq kingusinnerpaaq februarip aallaqqaataat Amerlanerpaamik peqataasinnaasut: 10

Qinnuteqarfissaq kingusinnerpaaq: februarip 8-at

Bibeli aqqutigalugu tarnikkut isumaginninneq na-la-ataminnillu kingunerlutsisimasut pillugit pikkorissaaneq, palasit ataatsimiinnerisa nalaanni qulequttat sammineqarsimanngitsut. Minna Winsløj-imit Marlunngorneq marsip 12-iat sisamanngorneq marsip 14-iat Hotel Arctic-imi

Meeqqanut tarnikkut isumaginninneq, ajunaarnersuaqartillugu, meeqqamik katatsisoqartillugu, imminut toquttoqarsimatillugu il.il. isumaginninneq. Pikkorissartussatut ilaasussat siumoortumik sorleq sammerusunnerlugu nalu-naassapput tamakkernissaannut piffissaqanngimmat.

Amerlanerpaamik peqataasinnaasut: 8

Qinnuteqarfissaq kingusinnerpaaq: februaarip 22-at

Palasi siuttuusutut suleqatitullu

Pingasunngorneq 3. april – Sisamanngorneq 4. april, Hotel Hans Egede-mi. Palasit affaasa siulliit pinngitsooratik pikkorissarfissaat (Affaasa aappaat aappaagu)

Sammissassat:

Palasi, provsti biskopilu siuttuusutut

Aqutsineq attaveqatigiinnissamullu iliuusissat

Aqutsisuusarnermut teoriit Søren Kierkegaard isumassar-siffigalugu

Atuartsisut Sofie Petersen, Marianne Platou Olsen, Morten Nornild, Minna Winsløj

Ukioq manna peqataasussat: Paneeraq, Parma, Aviaja, John, Paalu, Nukanguaq, Marianne, Bendt, Jens Kristian. Aappaagu: Emilie, Mānguak, Henriette, Juaanna, Thala, Looqi, Minik, Hans, Dorthe, James.

Kujataani ajoqitut atorfillit pinngitsooratik pikkorissarfissaat

Marlunngorneq 10. september – sisamanngorneq 13. september, Qaqortumi


Eqqaasitseqqissutitut pikkorissarneq misilittakkanik apeq-utinillu taartigeeqatigiiffik:

Ajoqitut ileqqussat tarnikkullu isumaginninneq Minna Winsløj-imit.

Apersortittussanut atortussat nutaat “Angeruseq” ilisartinneqassapput iltsersuutitai sungiusaatitaalu ilanngullugit.

Tarnikkut isumaginninnermi qulequttat makku sammisavagut: Nipangiussisussaataaneq, tarnikkut isumaginninnermi oqaloqatigiittarneq aamma angumerisinnaagut-sigit, soorlu makku: Aliasuuteqartunik isumassuineq, imminut toqunneq, meeqqanik atornerluinerit il.il.

Peqataasut: Arsuk: Janus Sørensen, Qaqortoq: Karoline Motzfeldt, Narsaq: Lone Egede, Nanortalik: Morten Gyllich, Aappilattoq: Johan Gideonsen, Narsarmijit: Theodora Simonsen, Tasiusaq: Ferdinand Semsen, Ammassivik: Ananias Thorsteinsen, Alluitsup Paa: Louise Joelsen



Asuki Qasigiannuani

Oqaluffimmi nipilersornermut pikkorissarneq (Siuisinnerusukkut pattattunut ilinniarneq) modul 1

Pingasunngorneq 18. september – Pingasunngorneq 16. oktober Hotel Arctic-imi, Ilulissat

Qinnuteqarfissaq kingusinnerpaaq: 1. april

Amerlanerpaamik peqataasinnaasut: 14

Ajoqitut ilinniarneq modul 3

Tallimanngorneq 13. september – sapaat 13. Oktober Hotel Arctic-imi, Ilulissat.

Anniarsiorfiit nalaat 2019 qanoq atorumaarpiuk?

BISKOP SOFIE PETERSEN

Ukiup ingerlanerani ullut suut nalleraangatsigit inuunitsinni pisarsimasut kingumut eqqaanngitsoortanngilagut. Anniarsiorfiit nalleraangatsigit meeraanerup ullui eqqaasarpakka; ullut nipaarsaarfiit silamiluunniit aneeraangatta nilliaqusaanngilagut, ullut-sinnili ilaasaluunniit anniarsiorfiit - ullut immikkuullarinnerat - naluat.



Saarlumi atuasooq Dana Kanuthsen

Eqqarsaatiginngitsoornerlu ajorpara 2001-imi Ilisimatufimmi ilinniartut Fyn-imilu domprovsti angalaqataalu ilagalugit Israel-imi angalanerme Via Dolorosa (Anniarnerup aqqutaa) aqputigigatsigu malugisara: uagut kalaallit nalunannigsumik qamuuna attortissimalluta nipaatumik ingerlanerput ukulu angalaqativut soorlulusooq immikkut attortisimannigsumut, pisarnermissut oqaloqisut.

Soorunalumi Anniarsiorfiit nalaani Naalakkatta Jiisusi-Kristusip anniarneranik toquneranillu oqaluttuaq atuarparpara naalagiarnernullu malinnaaniartarlunga, ilami oqaluttuaq nalunngilluinnaraluarlugu taamaattoq atuaqqinnera eqqarsalersitsisarpoq. Ulluinnarniillu annerusumik pisut uatsinnut qanoq isumaqarnerisut eqqarsaatigisarlugulu qujaniutigisarlugulu, ilami asannineq tassuuna uatsinnut tunniunneqartoq tupinnarlunilu tuppallernaqimmat.

Nalunngilara anniarsiorfiit nalaat ilaannit ima ator-neqartartut:

Neqitornaveersaarfittut, mamakujuttunngiffittut, imigasamik attuinngiffittut, fjernsyn-imik isiginnaanngiffittut, radiomik nipilersuutinillu tusarnaanngiffittut tassa ulluinnarni sungiusimasamik allaanerusumik ileqquliussaqaqarnermik, ullullu taakkua allanik eqqarsaateqarsinnaanermut isumaliuteqarsinnaanermullu atorlugit.

Uanga tamanna tamakkiisumik atunngilara atornerusarlugulu "nipaallisimaffittut", soorlu nipiliutit – radio, fjernsyni nipilersuutilluunniit – ammatittuaannarnagit. Anniami oqaluttuaq atuariatlugulu nammineq isumaliutersuutigalugu eqqarsaatigalugulu, Tussiutitsinni tussiutivut "Jiisusi anniarlunilu toqusoq" ataani allassimasut imaluunniit atuakkat atuaqqillugit soorlu Mathias Storch-ip atuakkiaa "Naammassivoq", atuakkalluunniit allat upperisatsinnut attuumassuteqartut.

Taama nipaallisimaneq isumaliutersorfimmik eqqarsaateqarfissamillu imminut piffissaqartitsineq pingaartillugulu atuineq imaannaanngitsumik tunisisarpoq qaratsamut piinnarani aamma qamuuna, soorlulusooq nukissanik nutaanik tunineqarluni.

Nalunngikkaluarpara allarpasuit aamma taamaaliortartut, kajumissaarutigissavarali allanut aamma misileqqullugu.



Ajoqi Louise Joelsen, Organi Johannes Kleist

Aasianni 2018-imi juullilernerani pisut

ALLATTOQ DORTHE T. PETERSEN

Namminneq piumasutsiminnik kaageeraliornikut apersortittussat peqatigalugit illoqarfimmi utoqqarnut agguassinissaminnut piareersartut.

Apersortittussat poortuinissaminnut utaqqisut

Tele Post-imit puussiaaqqat tunniunneqartut Aviiseeraq Juullisiut, naneruutiniq marlunnik, kaagiaqqanik kiisalu mamakujunnik immeriarlugu illoqarfimmi nunaqarfinnilu utoqqannguanut agguanneqartarput, tamanit nuannaarutigineqartunik.



Egedep oqaluffia Aasiaat 2018-ip aasaani qaliata suliarineqarnera

ALLATTOQ DORTHE T. PETERSEN

Oqaatigineqarpoq maannakkut qisuaqqat ikkussuunneqartut

Kalaallit Nunaata silaannaanut nalequttuusut



Suliarinnginnerani isikkua



Naammassilerluni isikkua




Narsami palasitaamik ivertitsineq

Palasi Nukannguaq-Augustine Petrussen ivertinneqarpoq ulloq 16.december 2018 Narsap Oqaluffiani. Ivertitsineq nuannersumik kusanartumillu ingerlavoq. Naalagiarnermilu erinarsoqatigiit N.E.P.80 palasinn-gortoq tikilluaquniarlugu tussiarput, ajoqi soraarnerup aqutsisuusullu Sebulon Poulsen taalliaa erinaraa “Illu qaarsumi sanaasoq” atorlugu una:

Nuannaarfigaarput ulloq
ulloq pilluaqqusaq
kiffassatut sassalermat
ilagiinnut ullumi.
Pilluaqqusaali aamma
Guutip saani suliaq
Ilagiinnilu tamaani
Tuppallernartuugili.

Sulinermi aqputaavoq
tateqarneq pavani
suliap ingerlanissaa
issorissumiissappat.
Naatsiiassaq ikkutassaq
inerilluassappat
kisimi nakooqutaammat
qutsinnermi naalagaq.

Aqputaajumaarpoq aamma
tarnini merngortuni
aqputaassavorlu taanna
eqqississutaalluni
taannami oqarsimammat
qaagitsi tamassiaa
qasuerfissaq qanimmat
saanni piareersagaq.



Qinnut

HENRIETTE DIDRIKSEN

Guuterput qujanaq inuunermi maani ikinngummik, uummatitta asasaannik, qaammaqqutaanik tarnittalu kisaanik ingiaqateqartikkatsigu. Taamatut tunisininni periarfissinneqarpugut uumatitta nanertuutigisaanik annissuiffeqarnissatsinnut, oqilisaaqatigiinnissatsinnut, aammali nuannaqatigiinnissatsinnut illakulooqatigiinnissatsinnullu periarfissilluta sanileqartikkatsigu.

Illimmi nalunngilat inuit qanoq pisariaqartitsigineripput ikinngutitsinnik qanigisaqarnissarput, taakkuummata qungujulanitsinni uumatitta anniaataanik takunnissinnaasut.

Ikinngupput unnummi maani najornerani tasiork, tarniga paariuk, ilaqutai qanigisai tamaasa tasiukkit. Pisariaqartitsilissappatalu nukissaannik tunikkit uanut saaffiginnissinnaaqullugit ilinnulluunniit. Ullullu tamaasa pilluaqqusakkit najortuarlugillu.

Inunnguit, nunaqqatigut nunarsuarmioqatigullumi sulii ikinngummik taamaattumik nassaarsimannigitsut, nassaarnissaannut aqputissiuukkit kiserliortutut misigeqqunagit.

Guuterput, qujanaq ikinngummut taama asanartigisumut tunniussannut, amen.

